

Հայաստանի Հեռագրական Գործակալութեան մասին. — Յօդ. 1) Հայաստանի Հեռագրական Գործակալութեան նպատակն է՝ հաղորդել Հայաստանի ներքը և արտասահման ջաղաքական, տնտեսական, ֆինանսական և հասարակական հետաքրքրութիւն ներկայացնող տեղեկութիւններ :

Յօդ. 2) Հայաստանի Հեռագրական Գործակալութիւնը գտնուում է Հայաստանի Կառավարութեան կից, գործում է Նախարարների Սորհրդի անմիջական հսկողութեան տակ և առաջնորդւում է նրա հրահանգներով :

Յօդ. 3) Հայաստանի Հեռագրական Գործակալութեան վարչութիւնը գտնուում է Հայաստանի մայրաքաղաքում :

Յօդ. 4) Հայաստանի Հեռագրական Գործակալութիւնը կարող է մայրաքաղաքից և երկրից դուրս ունենալ բաժանմունքներ կամ գործակալներ, որոնք հաստատուում են գործակալութեան վարիչի կարգադրութեամբ : Գործակալութիւնը կարող է անմիջապէս համաձայնութեան մէջ մտնել ուրիշ հեռագրական գործակալութիւնների հետ՝ նրանցից տեղեկութիւններ ստանալու նպատակով :

Յօդ. 5) Հայաստանի Հեռագրական Գործակալութեան գործերի ղեկավարութիւնը, ինչպէս նաև պաշտօնեաներ հրաւիրելն ու արձակելը, աշխատակիցներին վարձատրութիւն նշանակելը վերապահւում է գործակալութեան վարիչին :

Յօդ. 6) Գործակալութիւնն իրաւունք ունի պետական հեռագրով ամէն օր տալ ձրի մինչև 600 բառով հեռագիր թէ Հայաստանի սահմաններում և թէ արտասահման : Պարլամենտի նստաշրջանում բառերի այս քանակը կարող է կրկնապատկւել, եթէ գործակալութիւնը հաղորդում է Պարլամենտի նիստի հաշեւուութիւնը :

Յօդ. 7) Յօդ. 6-ում յիշած բառերի քանակից (600 բառ.) աւելիի համար գործակալութիւնը վճարում է գոյութիւն ունեցող հեռագրավճարի 50% :

Յօդ. 8) Գործակալութեան թղթակիցների Հայաստանի դանադան մասերից գործակալութեան անունով ուղարկւած հեռագիրները հեռագրատունը հաղորդում է ձրի : Նոյնպէս ձրի են հաղորդւում և գործակալութեան հեռագիրները իր բաժանմունքին և գործակալների անունով : Նմանապէս և գործակալութեան փոստային առաքումները կատարւում են ձրի, համահասար կառավարական առաքումներին :

Յօդ. 9) Գործակալութիւնն իրաւունք ունի օրական երկու անգամ ձրի խօսել (ամէն անգամ 5 րոպէ) միջպետական և միջքաղաքային հեռախօսով : Նշանակւած ժամանակից աւելի խօսելիս վճարւում է արժէքի կէսը :

Յօդ. 10) Գործակալութիւնն իր ստացած հեռագիրները ձրիաբար ուղարկում է այն հիմնարկութիւններին և անձերին, որոնց ցուցակը ներկայացնում է Պարլամենտի Նախագահութիւնը և Նախարարների Սորհուրդը :

Յօդ. 11) Արգելւում է գործակալութեան հեռագրների արտատպումը գործակալութեան բիւլլետենների լոյս տեսնելուց յետոյ, 48 ժամայ ընթացքում :

Յօդ. 12) Սոյն օրէնքով վերացւած է համարւում Հայաստանի Սորհրդի կողմից 1918թ. դեկտ. 18-ին ընդունւած օրէնքը «Հայաստանի Հանրապետութեան հեռագրական գործակալութիւն հիմնելու մասին» :

Յօդ. 13) Սոյն օրէնքը իր ոյժի մէջ է մտնում Պարլամենտի Նախագահութեան կողմից հրատարակման օրից :

(Հաստատւած է 1920թ. ապր. 9-ին)